

Tala a Siakisone

Na ola ae Siakisone i se aiga o ni tagata faamaoni o Le Ekalesia a Iesu Keriso o le Au Paia o Aso e Gata Ai. E i ai ona matua agaalofa ma e sili ona latalata i lona tuafafine o Selena.

E fiafia Siakisone i le talalelei ma e i ai sana molimau ia Iesu Keriso ma le Toefuataiga. Ua lauiloa o ia i ona uiga fiafia ma le sogasoga. Peitai, talu ai nei, na suia ai lona fiafia i le faanoanoa, ma ua faateleina ai lona tuuatoatasi. E i ai se mealilo a Siakisone ma e le iloa le mea e fai e uiga i ai.

Po o le a lava le umi na te manatua ai, ua sili atu le tosina atu o Siakisone i alii nai lo tamaitai. Mo le tele o tausaga sa ia taumafai ai e aloese mai nei lagona pe faafoliga e le o i ai. Talu ai e lei talanoaina lava leni mataupu i lona aiga, sa ia lagonaina o se mataupu e faasa ona talanoaina. O nisi taimi sa faia ai e ana uo ni manatu faatiga e uiga i alii e tosina atu i alii. Pau lava le mea na te manatuina o le faalogo atu i faiaoga ma taitai i le lotu o faapea mai o se tagata e tosina atu i lona lava itupa o se agasala matuia.

A o lei alu lana misiona, sa augani atu pea Siakisone i le Atua e aveese lona tosina atu i alii. Sa ia lagona le mautinoa afai e auauna atu i se misiona, o le a suia ona lagona. Peitai, talu ona faamaeaina e Siakisone se misiona, o lona tosina atu i alii na i ai pea. Sa matuai mana lava Siakisone e talanoa atu i se tasi, ae o le fefe na le maluelue ai o ia.

Ua matauina e Selena lona solomuli faalelagona mai lo latou aiga. E mafai ona ia vaaia le tiga i ona mata. Sa tatalo o ia mo Siakisone ma tatalo ia iloa pe faapefea ona fesoasoani ia te ia.

O le taeao nei na fesili atu ai Selena ia Siakisone pe mafai ona la o faatasi mo se savaliga. Sa malie o ia ma le musuā. A o la savavali, sa la talanoa e uiga i mea o aso uma. Sa oo lava ina mafai ona ataata Siakisone ona o Selena. Mulimuli ane, na fai atu ai Selena, “Siakisone, ou te iloa e i ai se mea o tupu. Ou te iloa i ou mata. Faamolemole ta’u mai ia te a’u. Ou te matua popole lava mo oe.”

Sa tu Siakisone mo se taimi umi lava. Sa amata ona maligi ifo loimata i ona foliga. Mulimuli ane, na tupu ae lagona mai le taele o le loto, ma faatasi ai ma le gatete o lona leo sa ia fai mai, “Selena, o a’u e faafafine ma sa ou i ai mo le umi ou te manatua ai. Ua ou le iloa le mea a fai. Ou te fefe po o le a le tala a Tina ma Tama pe afai la te iloina. Mata o le a maasiasi le tatou aiga atoa ia te au? Mata o le a mananao pea a’u uo e tafafao faatasi ma a’u pe afai latou te iloa o a’u e faafafine? O le a le mea o le a tupu i lo’u auai i le Ekalesia pe afai ou te ta’u atu i le epikopo? Ou te le iloa pe faapefea ona ou fiafia ma maua se aiga. Ou te lagona e pei ua tuulafoaiina au e le Atua.”

Sa punou le ulu o Siakisone ma sioa atu i le elele. Ina ua mavae sina taimi, sa ia fai mai lemu, “Selena, ou te faamalie atu pe afai ua e le fiafia ia te au. Faamolemole aua nei ta’uina i se tasi. Ua ou le iloa le mea a fai ma ua le mautonu.”

Fesili mo Talanoaga

1. O a ni ou lagona a o e mafaufau e uiga i le aafiaga o Siakisone? Aisea e ono faigata ai ona talanoa e uiga i lagona o le tosina atu i le itupa tutusa ma se tagata o le aiga, uo mamae, po o se taitai o le Ekalesia?
2. Mata o a ni ou lagona pe ana faapea o oe o Selena? O le a se mea e mafai ona fai e Selena e tali atu ai ma le malamalama ma le agaalofa?
3. E mafai faapefea e se malamalama sa’o i aoaoga a le Alii i le tosina atu i le itupa tutusa ona fesoasoani ia Selena ma Siakisone? Aisea e ono faigata ai i nisi taimi ona talia nei aoaoga?
4. E mafai faapefea ona vaaia Siakisone ma Selena i le tosina atu i le itupa tutusa ma se vaaiga e faavavau?
5. O fea e mafai ona liliu i ai Siakisone e maua ai le taitaiga faopoopo, faamalosiuga, ma le fesoasoani?